

## lis Gnovis

■ **ROME.** «Cungjò, mestri dal pluralisim juridic»



Ai 4 di Lui, al è muart a 89 agns il president emerit de Cort costituzionâl, Paolo Grossi. La brute gnove e à causionât un marum grant in dut il Popul regionâl dai Bens coletifs che tal professôr florentin al veve un protetôr e un inspiradôr, valent e larc di cûr. La sô opare fundamentâl «Un altro modo di possedere». L'emersione di forme alternative di proprietà alla coscienza giuridica postunitaria», publicade dal 1977 e tornade a stampâ dal 2017, e je stade la fonde dal resuriment de Proprietât coletive in Italie, screant un'atenzion culturâl e científiche, sociâl e politiche che no à cessât mai altri di cressi. Al à stât Grossi, storic dal dirit e dean dal «Centro Studi e Documentazione sui Demani civici e le Proprietà collettive» di Trent, a marcâ la specificitât antropologjiche dal «mût diferent di possedi» incjarnât dai Dominis coletifs; a detâ i principis de Leç statâl 168/2017 (ch'è a ratificât il ricognossiment costituzionâl de Proprietât coletive, abolint i principis fassiscj de Leç 1766/1927); a raccomandâ ai Consuarts, ai Frazioniscj e ai Vicins de Patrie di vè simpri tal cûr «une psicologjie ative, combative, di resistance a l'ignorance e a l'ostilità, in non de grande funzion economiche e sociâl, storiche e etniche, ch'o puartais indevant».

■ **PASIAN DI PORDENON.** A pro di furlans e di talians

Il president dal plui impuartant Fogolâr dal Brasil, José Zanella, dai 22 di Avrîl, al fâs ançe il servizi di «agjent consolâr onorari d'Italie», te sô citât di Santa Maria, tal stât dal Rio Grande do Sul. Zanella al à cjapât servizi, intant di une cerimonie imaneade a Porto Alegre, li dal Consolât, presint il consul Roberto Bertot e la segretarie gjenerâl Loy Demari. L'inzegnîr José Zanella (cun vons di Pasion di Pordenon) al à insegnât li de Universitât federâl di Santa Maria par 32 agns e al à stât assessôr a la culture de sô citât. Dal 2001 al guide il «Circolo friulano di Santa Maria». Tal «Dizionario Biografico Friulano» de «Clape Culturâl Acuilée», al comparis cu lis sôs fiis, Cristine Koehler Zanella, professore universitarie e traduttore, e Rafaela, «Miss Brasil» 2006.

■ **GURIZE.** I gjambars dal Judri

Al è dedicât a l'aghe, a la sô protezion e a la discuierte dai siei segrets e dai siei abitudôs la conte «Mi piacerebbe che tornassero i gamberi, nel fiume» che i à permetût al speleolc gurizan, Marco Meneghini, di otignî une «menzon speciâl» al premi artistic su lis grotis dal Cjars. Il concurs «Cave and Karst Art Contest 2021» al jere imaneât de «Federazion speleologjiche europeane», di ch'è strade dal «An internazionâl des Grotis e dal Cjars» («International Year of Cave and Karst»). Cun Meneghini, si son confrontâts une novantine di artiscj speleolc di 19 Paîs. Meneghini al è component dal Centri ricercjîs cjarulîs «C. Seppenhofer» di Gurize e de comission «Cavitâ artificiali» de Societât speleologjiche taliane. Al à cjapât part al «Contemporary Art Festival» di Pergine Valsugana, cu la conte «Buse dal Diaul», e al à presentât ch'al è pôc un'edizion gnove dal romanç «Lo spiraglio nella Valle», ambientât te valade dal Judri.

<b>Mercus 20</b>	S. Elie profete	<b>Domenie 24 XVII Domenie vie pal an</b>	
<b>Joibe 21</b>	S. Laurinç	<b>Lunis 25</b>	S. Jacum
<b>Vinars 22</b>	S. Marie Madalene	<b>Martars 26</b>	S. ts Ane e Joachin
<b>Sabide 23</b>	S Brigjide di Svezie	<b>Il timp</b>	Cjalt e temporai estifs



**Il soreli**  
Ai 20 al jeve aes 5.36 e al va a mont aes 20.51



**La lune**  
Ai 20 Ultin cuart.

**Il proverbi**  
Se no si po fâ ce che si vorès, si scuèn fâ ce che si pues.  
**Lis voris dal mès**  
Prime che a sflorissin, cjapait sù tim, salvie, mazorane salvadie. Taiat i butui di mazorane e lavande che, po, o secjarès.

## Par une transizion vere

La rêt de Diminuzion e da l'Economie solidarie a Vignesie

In di di vuê, il non gnûf de pâs e de curie de vite nol è plui «svilup», cemût che Pauli VI al scriveve te Letare encicliche «Populorum progressio» za fa 50 agns, ma «diminuzion». Ceste riflessione e je tal centri dal apel «Dalla illusione della crescita verde ad una democrazia della Terra», ch'al struche reasons e obietifs ch'a daran vite a la convigne «Decrescita: se non ora quando?», programade dai 7 ai 10 di Setembar a Vignesie, de «Associazione per la Decrescita», dal «Movimento per la Decrescita Felice» e de «Rete Italiana dell'Economia Solidale», ançe cul patrocini de Università dal Friûl.

Una grande rêt di clapis e d'istituzions, seguint la ferade de «III Conferenza internazionale sulla decrescita» di 10 agns indaûr, e intint di tirâ dongje lis esperiencis e lis riflessions svilupadis tai ultins tims par dâ snait a la «trasformazion dal model di civilizzazion», necessarie par fermâ la «devastazion ambiental, la disavualitât cressint, la difusion di formis gnovis di puaretât, ma ançe la pierdite di autonomie e la dipendence simpri plui grande dal marcjât».

I organizadôrs dal apontament di Vignesie a invidin a tornâ al principi de «diminuzion» par distaponâ l'ingian dal marcjât capitalistic che, sot dal «grant cjapiel dal «svilup sostenibile», al à rivât adore di fâ diventâ «imprescj di podê o di profit ançe lis ideis e lis propuestis de sostenibilitât, de transizion, de resilience, de circolaritât, dal biologic...», ma dome par narcotizâ la volontât di trasformazion di chei sistemis sociâi e produtifs ch'a smirin «di garantî la durade dal «business» e no la riproduzion de vite».

Ma la peraule «diminuzion», ançe se «cjalade cuntun'ande smafare o cun asse, e resist a cheste cooptazion. E ten dîr – si lei tal apel – parcè che nus impense che lis tecnologiis di bessolis no poda-



Il cai ch'al popularize il principi de «Legre diminuzion»

Dai 7 ai 10 di Setembar, par trasformâ un model di svilup falât e pericolôs

ran salvâns e ch'al ocor tornâ a discuti lis nestrîs pretesis e lis nestrîs prioritâts», ricognossint che «par podê condividi i dirits, al vûl bandonâ i vantaçs».

Una transizion ecologjiche, democratiche e pacifiche vere, seont i promotôrs di «Decrescita: se non ora quando?», e pretint che tal puest de brame dal profit a sedin metudis la curie e la rigenerazion de vite, mediant di «formis gnovis di scolte e di ricognossiment, di proprietât e di gjestion, di educazion e di lavôr, di produzion e di riproduzion, di condivizion e di scambi, di consum e di rigenerazion, di formis di abitâ e di viazâ».

Il confront di Vignesie al profundissarâ 4 cuistions, ch'a varan ognidune i siei animadôrs. Su la tematiche «One Earth, one Health, one Life, per un'idea piu ampia di salute e di cura delle persone, degli animali, del pianeta», lis guidis a saran: Vandana Shiva, Carlo Modonesi e Jean Louis Aillon. Su «Buen Vivir/Vivir Bien. Che cos'è una buona vita? Oltre il paradigma del benessere, ripensare il senso e la qualità della vita» si partissarâ dai interventis di Amaia Perez Orozco, di Lorenzo Velotti, di Marco Bersani e di Silvia Federici. I animadôrs

de tierce cuistion, «Nuove architetture sociali. Praticare la transizione attraverso nuove forme di condivisione, di comunità, di cooperazione e organizzazione sociale», a saran: Jason Hickel, Mario Pansera e Emanuele Leonardi. L'ultime tematiche e frontarâ «Un agire politico trasformativo. Un nuovo sperimentalismo democratico per rendere possibile un progetto collettivo di cambiamento», cun interventis di Luigi Pellizzoni, di Viviana Asara, di Marco Deriu e di Timothee e Parrique.

In spiete de convigne dal mès di Setembar, a laran indevant i moments di preparazion. Vie pal mès di Lui, a 'nd è programâts doi. Dai 23 ai 24 di Lui, a Dronero, par cure dal «Gt Spiritualità» dal «Movimento della Decrescita Felice», al sarà proponût il percors dal individuâl al universâl «Noi siamo uno». Ai 28 di Lui, si resonarâ su «Decrescita e cooperazione internazionale», intun confront «zoom» e «facebook», cun Giovanni Spaliviero e Silvana Galassi. Dutis lis informazions a son sometudis dai lûcs internet de convigne, [www.venezia2022.it](http://www.venezia2022.it) e [www.decrescita.it/verso-venezia-2022/](http://www.decrescita.it/verso-venezia-2022/).

Mario Zili

## Tradizions furlanis dal mès par cure di Mario Martinis

## SAGRIS E FIESTIS DI PAÏS

Rivade la biele stagion e finide la racuete e la seseladure dal forment, il contadin al podeve gjoldi la meretade polse sot dal sollion, prime des fadiis de vendeme e des voris di sieradure de anade agrarie. Cussì, di secui in ca, in ogni bande dal Friûl vie pal Istât si tignivin fiestis e sagris, che a podevin jessi di divignince religjose (intituladis al sant patron dal paîs, ae dedicazion de glesie, a un avôt, a un piligrinaç, etc.) o civil (aniversaris, moments stagionâi, mostris di pomis dal periodi, etc). Se a vevin ançe la part religjose, cheste (novene, tridui, confessions, messe grande de domenie e procession tal dopomisi) e anticipave i divertiments (bai, rompi lis citis, corse cui sacs, etc.) te place dulâ che a jerin logadis, giostris, gabiis, barachins dal tir al bersai e di altris intratigniments, barachis pal mangjâ e pal bevi, barachins pai golosets (pevarins, corobulis, colaçs, licuiriciis, mentutis e dolçuts di ogni fate) o pes marcjanziis. Lis



sagris a podevin ançe jessi intituladis ae mostre e ae vendite dai prodots dal lûc: pes, crustacis, cais, crots, mîl, cjariesis, pierçui, pîruçs, miluçs, coculis, pomulis di bosc, foncs, sparcs, patatis o altris prodots de tiere, o ben persut, frico e formadi. Une vore nomenadis a jerin lis fiestis dal vin (Buri, Seorgnan, Udin, Nimis, Faedis, Cividât, Spesse, Cjarsarse, etc) e ornitologjichis (Sacil e Trevesin). Secont il gîr dal calendari, lis fiestis e lis sagris di paîs a scomençavin cun ch'è di Sant Josef (il 19 di Març) par finî cun ch'è de Cuarte di Avost. Di là dal confin de cuarte domenie di Avost, si tignive però ancjemò cualchi antighe fieste peade a datis fuartis dal calendari come la Madone di Setembar (8-IX), la Adolorade (15-IX), Sant Michêl (29-IX), la Madone di Otubar (7-X) e, in ultin, lis fiestis dai Sants Simon e Luche (28-X), dai Sants (1-XI), di S. Martin (11-XI), di S. Catarine (25-XI) e di S. Andree (30-XI).